



Aktiviti Kesukarelawanan agenda perdana MPP

Naib Canselor Universiti Malaysia Pahang (UMP), Profesor Dato' Dr. Daing Nasir Ibrahim mengajak mahasiswa memanfaatkan ruang dan peluang sedia ada bagi memastikan suara mereka didengari dan dirasai masyarakat sekitarnya.

Selain itu, beliau mengharapkan agenda kesukarelawanan yang diwarisi dari satu generasi ke generasi lain ini juga dapat diteruskan dengan menyusun keutamaan dan gerak kerja dalam menyuburkan aktiviti ini sebagai agenda perdana untuk dijuarai.

"Saya bersyukur dengan pemilihan Majlis Perwakilan Pelajar (MPP) Sesi 2011/2012 pada 22 Februari lalu yang dijalankan dengan suasana harmoni dan penuh kekeluargaan serta tanpa sebarang kejadian yang tidak diingini.

"Ianya mencerminkan kesarjanaan warganya yang matang, bijaksana dan berhemah dalam mengekalkan suasana harmoni di dalam kampus," katanya semasa berucap merasmikan Majlis Penyerahan Watikah Pelantikan dan Angkat Sumpah Jawatan MPP di Dewan Bankuet Canseleri pada 25 Februari 2011 yang lalu.

Katanya, pelaksanaan agenda kesukarelawanan juga harus dipuji apabila sekumpulan mahasiswa UMP merentas negeri-negeri di Semenanjung Malaysia untuk merakyatkan kempen Kami Prihatin baru-baru ini.

".....harapan agar MPP dapat menterjemah Pelan Strategik UMP 2011-2015 dengan mengemukakan inisiatif dan program yang memberi nilai tambah dalam konteks tertentu melibatkan kualiti akademik, kelestarian kewangan, pembangunan sosio-ekonomi atau penjenamaan."

- Profesor Dato' Dr. Daing Nasir Ibrahim

Beliau turut meletakkan harapan agar MPP dapat menterjemah Pelan Strategik UMP 2011-2015 dengan mengemukakan inisiatif dan program yang memberi nilai tambah dalam konteks tertentu melibatkan kualiti akademik, kelestarian kewangan, pembangunan sosio-ekonomi atau penjenamaan.

Profesor Dato' Dr. Daing Nasir juga merakamkan penghargaan kepada kepimpinan MPP sesi 2010/2011 diketuai Mohd. Aedlan Nur Ahmad atas sumbangan dan komitmen yang ditunjukkan sepanjang penggal perkhidmatan mereka.

Sementara itu, Yang di-Pertua MPP yang baharu dilantik, Muhammad Fazli Abdul



Halim berazam sentiasa bersikap profesional dalam semua lapangan dan menggunakan pendekatan penuh hikmah untuk meneruskan legasi kepimpinan mahasiswa.

Dalam majlis ini seramai 24 ahli Majlis Perwakilan Pelajar (MPP) UMP Sesi 2011/2012 mengangkat sumpah menunaikan kewajipan dan taat setia di hadapan Naib Canselor UMP, Profesor Dato' Dr. Daing Nasir Ibrahim.

Selain Muhammad Fazli, MPP kali ini menyaksikan Timbalan Yang di-Pertua disandang Sazwan Sahar dan Shahira Mohd Basir dilantik sebagai Setiausaha di samping 21 ahli lain menganggotai kerusi umum dan fakulti.